



«Նոր ժամանակի կրթությունում» ՀԿ

*ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ*

*ԱՎԱՐՏԱԿԱՆ ՀԵՏԱԶՈՏԱԿԱՆ
ԱՇԽԱՏԱՆՔ*

*Հետազոտության թեման՝ ԸՆՏԱՆԵԿԱՆ ՀՈԳԵԲԱՆՈՒԹՅՈՒՆ.
ԿՈՆՖԼԻԿՏՆԵՐ*

Առարկան՝ ՊԱՏՄՈՒԹՅՈՒՆ

Հետազոտող ուսուցիչ՝ ՀՈՎՀԱՆՆԵՍ ԴԱՆԻԵԼՅԱՆ

Ուսումնական հաստատություն՝

Ալավերդու Կարապետ Դոլինյանի անվան N11 միջնակարգ դպրոց

Երևան 2022

Գլխավոր հարցեր

1. Ո՞րն է ընտանիքի դերը հասարակության մեջ, և ի՞նչ ազդեցություն են թողնում ընտանեկան հարաբերությունները սովորողների դաստիարակության և հոգեվիճակի վրա:
2. Որո՞նք են կոնֆլիկտների հիմքերը, և ի՞նչ հետևանքներ են թողնում դրանք սովորողների մոտ:

Բովանդակություն

Ներածություն	4
Մաս Ա Ընտանեկան հոգեբանություն	
Գլ 1 Ընտանիքի էությունը, կառուցվածքը, գործառույթները	6
Գլ 2 Երեխայի դաստիարակությունն ընտանիքում	8
Մաս Բ Կոնֆլիկտներ	
Գլ 1 Կոնֆլիկտների էությունը, տեսակներն ու հիմքերը	10
Գլ 2 Հաղթահարման ուղիները: Կոնֆլիկտների ազդեցությունը սովորողների ներաշխարհի վրա	12
Եզրակացություն	13
Օգտագործված գրականություն	14

Ներածություն

Թեմայի արդիականությունը – Մեր օրերում անհրաժեշտ է ունենալ խելացի, լայն աշխարհայացքի տեր երիտասարդություն և ընդհանրապես հասարակություն, որը կկարողանա դիմակայել ներկա ժամանակների մարտահրավերներին տարբեր ոլորտներում: Եվ ահա այդ վաղվա երիտասարդներն այսօրվա սովորողներն են, որոնք պետք է այդ որակներին հասնեն այսօրվա ստացած կրթությամբ և դաստիարակությամբ դպրոցում, բուհում և առավել ևս ընտանիքում: Ընտանիքը հենց այդ դաստիարակության հիմքն է, որն ապագա երիտասարդը կստանա որպես հիմք վաղվա լիարժեք գիտելիքի, լայն աշխարհայացքի համար: Այս դեպքում սովորողը կդառնա իր երկրի լիարժեք և լիիրավ քաղաքացին: Ահա թե ինչու է կայանում թեմայի արդիականությունը: Սովորողների դաստիարակությունն սկսվում է վաղ մանկության շրջանում, որին հաջորդում են մանկապարտեզը, դպրոցը: Եվ այդ ճանապարհին շատ կարևոր է կրթական հաստատությունների և ընտանիքի համագործակցությունը: Մանավանդ դասուցելը պիտի մշտապես կապ ապահովի ծնողների, ընտանիքի հետ, իմանա սովորողի առանձնահատկությունները, ընտանեկան վիճակը, որտեղ ապրում է սովորողը:

Ընտանիքի ներսում լիարժեք առողջ, հավասարակշռված անհատ ձևավորելու հարցում շատ կարևոր են ներընտանեկան հարաբերությունները, որոնք նպաստում են սովորողի հոգեվիճակի կայուն և ներդաշնակ ձևավորմանը, ինչպես նաև տարբեր արժեհամակարգերի ձևավորմանն ու զարգացմանը: Շատ կարևոր է նաև հետևողական ուշադրությունը, օբեկտիվությունը, սեփական վարքագծով օրինակ ծառայելը՝ վերոհիշյալ նպատակին հասնելու հարցում: Կարևոր է նաև միաժամանակ սիրել երեխային, բայց կարողանալ խիստ լինել, զգալ այդ չափը, սահմանը: Այդ քայլով ծնողները զերծ կպահեն երեխային էգոիզմի հատկանիշների ձևավորումից: Ընտանիքը լուծում է նաև սովորողի սոցիալականացման հարցը: Այս խնդիրը լուծելով՝ սովորողի մեջ կձևավորվեն ինքնուրույն կարծիք արտահայտելու ունակություն, լիարժեքության զգացում: Դրա շնորհիվ սովորողը կյանքում զերծ կմնա կաշկանդված, կաղապարված լինելու մտածողությունից: Հենց ընտանիքում սովորողը պիտի գիտակցի, որ ինքը կոլեկտիվի, ընտանիքի անդամ է, և որ ինքն ունի լիարժեք իրավունքներ կոլեկտիվի մյուս անդամների պես: Միաժամանակ նա պիտի գիտակցի, զգա պատասխանատվություն, պարտավորվածություն ընտանիքի մյուս անդամների նկատմամբ: Ահա այսպիսի սովորողը հետագայում կդառնա պատասխանատու, պատրաստակամ, օգնող մարդ:

Եվ ահա, ելնելով վերոհիշյալ փաստերից, մեկ անգամ ևս արձանագրում ենք, թե ինչքան կարևոր ու արդիական է այս թեման և նրա ուսումնասիրությունը:

Հետազոտության նպատակը - Բազմակողմանի հետազոտության արդյունքում ուսումնասիրել ընտանիքի հոգեբանությունը, պարզել նրա դերը սովորողի դաստիարակության և ապագա լիարժեք քաղաքացու ձևավորման գործում:

Հետազոտության խնդիրները - 1.Նպատակին հասնելու համար կատարել տարբեր ուսումնասիրություններ, օգտվել տարբեր գիտական աղբյուրներից:

2. Մեկնաբանել և արժևորել ընտանիքի ներդաշնակության կարևորությունը սովորողի դաստիարակության ու կայացման գործում՝ որպես լիարժեք մարդու և քաղաքացու:

Մաս Ա

Ընտանեկան հոգեբանություն

Գլուխ 1

Ընտանիքի էությունը, կառուցվածքն ու գործառույթները

Ամուսնությունն ու ընտանիք կազմելը յուրաքանչյուր մարդու կենսական անհրաժեշտությունն է: Այն տղամարդու և կնոջ միջև կամավոր կապն է ողջ կյանքի ընթացքում, որը հիմնված է սիրո և հարգանքի վրա: Ամուսնությամբ ձևավորվում է ընտանիքը՝ ընդհանուր տանիքի տակ ապրող արյունակից հարազատների խումբը, որը հիմնականում գոյանում է ամուսնությամբ: Այն և՛ սոցիալական կառույց է, և՛ սոցիալական խումբ: Որպես կառույց՝ ընտանիքում առաջ են գալիս յուրահատուկ հոգեբանական հարաբերություններ ընտանիքի անդամների միջև, որոնք առաջին հերթին ունեն բարոյական հիմքեր: Սակայն երբեմն դրանք արտահայտվում են իրավական ակտերով և օրենքներով: Որպես խումբ՝ ընտանիքում ապրող մարդիկ ունեն նույն նպատակները, առաջնորդվում են նույն արժեքներով՝ ի շահ բոլորի: Փաստորեն ընտանիքում գործում են մշտական կապեր, կարծիքների բախում: Այսպիսի ընտանիքում են ձևավորվում վաղվա օրվա լիարժեք, հոգեբանորեն առողջ քաղաքացիները: Ինչպես նշեցինք, ընտանիքի հիմնական կորիզը ամուսիններն են՝ այրն ու կինը: Սակայն երբեմն նրանց հետ նույն հարկի տակ ապրում են նաև նրանց ծնողները: Ընտանիքի առանձնահատկություն է այն, որ ընտանիքը ընդլայնվում է ներսից՝ ի հաշիվ երեխայի ծննդի:

Ժամանակակից ընտանիքի տեսակներն են

1. Միջուկային - այր, կին, երեխաներ
2. Ընդլայնված - ամուսինները, երեխաները և ամուսիններից մեկի ծնողները
3. Նահապետական - ծնողները, իրենց երեխաների, թոռների ու ծոռների հետ:

Ըստ հարաբերությունների՝ ընտանիքները լինում են՝

- 1 Ժողովրդավարական
- 2 Ամբողջատիրական

Ժողովրդավարական ընտանիքներում ձևավորվում է հոգեբանական առողջ միջավայր՝ դաստիարակվում են լիարժեք, առողջ հոգեբանություն ունեցող անհատներ: Այսպիսի

ընտանիքներում են ձևավորվում դաստիարակության համար անհրաժեշտ լիարժեք պայմաններ:

Ընտանիքում կարևոր են նաև գործառույթների կատարումը:

Ղրանք են՝ սերնդափոխության, դաստիարակչական, ֆինանսական, սոցիալական, տնտեսական:¹

Ինչպես նշվեց սրանց իրականացումը ևս շատ կարևոր է ընտանիքի ամրության և լիարժեքության համար:

¹ Ս. Պետրոսյան, Ս. Խաչատրյան, Հասարակագիտություն 2014

Երեխայի դաստիարակությունն ընտանիքում

Դարեր շարունակ երեխաները դաստիարակվել են ընտանիքում և ուսումնական հաստատություններում: Սկսած 18 - րդ դարից՝ ընտանեկան դաստիարակության առնչությամբ առաջ եկան մի քանի ուղղություններ: Առաջինի ներկայացուցիչ Պեստալոցին սովորողի համար հայրական տունը համարում էր բնական հիմք: Նա նշում էր, որ սովորողի դաստիարակությունն այստեղ տեղի է ունենում բնական ճանապարհով: Միաժամանակ նա չէր բացառում ուսումնական հաստատությունների դերը դաստիարակության գործում:

Երկրորդ ուղղության ներկայացուցիչը անգլիացի Օուենն էր: Նա առավելություն էր տալիս պետական միասնական դաստիարակությանը: Նշում էր, որ տունը և տնային դաստիարակությունը կարող են դառնալ էգոիզմի հիմք: Նոր ժամանակներում, սակայն, մեծ մտածողներն ու հոգեբաններն առաջ քաշեցին ընտանիքի, ուսումնական հաստատության և պետության միասնական կարևորությունը սովորողի դաստիարակության գործում: Ըստ դրա էլ առաջ եկավ երրորդ ուղղությունը: Սրա ներկայացուցիչները միակարծիք էին, որ միասնական պետք է աշխատեն ընտանիքը, դպրոցը և հասարակությունը: Իհարկե, հիմքն ընտանիքն է, որն ավելի լավ գիտի սովորողի առանձնահատկություններն ու նրբությունները:

Սովորողի հոգեվիճակի վրա ամուր հետք է թողնում մանկությունից ստացած դաստիարակությունը՝ մոր և հոր սիրո և հոգատարության մթնոլորտում: Միայն այս ամենի առկայության դեպքում է սովորողի դաստիարակությունը լինում լիարժեք, այլապես այն լիարժեք լինել չի կարող: Դեռ ավելին, ծնողները սեփական օրինակով պետք է դաստիարակեն երեխային, շտկեն իրենց բացասական գծերը, և միայն դրականը սերմանեն երեխայի մեջ: Սովորողների մեջ պետք է ձևավորվեն այնպիսի արժեքներ, ինչպիսիք են պատասխանատվությունը, պարտքը, հումանիզմը, շփումը մյուսների, բարեկամների հետ: Պետք է արմատախիլ արվեն էգոիզմը, կամայականությունը և այլն: Կոմենսկին ասում էր. «Երեխայի մեջ հաստատուն է կյանքի առաջին տարիներին արմատավորվածը»:²

Երես տալը, կամայականությունների կատարումը ծնողների կողմից ևս, բացասական հետևանքներ կթողնեն երեխայի մեջ: Դա կարող է դառնալ չարիք և կործանել երեխային՝ ըստ Ռուսոյի: Հետևաբար պետք է գտնել չափավորության այդ նուրբ սահմանը՝ միաժամանակ սիրելով երեխային՝ լինել խիստ: Մյուսն ընտանիքում երեխաների մեջ օբյեկտիվության ու արդարության պահպանումն է:

² Յ. Ամիրջանյան, Ա. Սահակյան, Մանկավարժություն, Երևան, 2005

«Արդարությունն ամենաուժեղ զենքն է»: / Ու.Չերչիլ/

Մյուս կարևոր նպատակը սովորողի մեջ հայրենասիրության սերմանումն է, որը պիտի ընթանա դասղեկի, դպրոցի և ընտանիքի համատեղ և հետևողական աշխատանքի շնորհիվ: Շատ կարևոր է նաև սովորողին գրականությանը, մշակութային արժեքներին հաղորդակից դարձնելը: Այդ նպատակի համար պետք է ծնողներն ավելի հաճախ կարդան: Այս ամենը սովորողի մեջ կնպաստի բարության, հոգատարության, հումանիստական արժեքների ձևավորմանը: Այստեղ ևս միաժամանակ կարևոր է զգալ չափը և սովորողին հետագայում չվերածել զոհի:

« Սեփական հարկի տակ պետք է սովորողի մեջ սերմանել հումանիզմի ծիլերը»:
/Ցիցերոն/ Դա առաջին հերթին արտահայտվում է տանը՝ տան անդամի նկատմամբ, իսկ այնուհետև նաև դրսում: Սրան զուգահեռ սովորողը հենց ընտանիքում առաջին հերթին պետք է հաղորդակից դառնա բարոյական նորմերին, սոցիալականացվի: Ընտանեկան միջավայրի մի յուրահատուկ առանձնահատկությունն էլ այն է, որ ընտանիքը պիտի անդամներից յուրաքանչյուրին տա այն, ինչը պետք է իրեն և նրանից վերցնի այն, ինչը պետք է ընտանիքին: Փոխադարձ այս կապի շնորհիվ է, որ սովորողի մեջ ձևավորվում է պատասխանատվության և պարտքի զգացում ընտանիքի մյուս անդամների, ինչպես նաև հասարակության հանդեպ:

Սովորողի մեջ պետք է կարևորվի նաև Մարդ մնալու անհրաժեշտությունը, որը նույնպես պետք է սերմանվի նախ ընտանիքում և շարունակվի նաև դպրոցում:

«Աշխարհում ամենայն բարձր կողմը մարդ լինելն է»: /Թումանյան /

Կուրացի Մարտինն էլ նշում է, որ ամենադժվար մասնագիտությունը մարդ լինելն է:

Հետևաբար, սովորողը պիտի փորձի տիրապետել այս բարդ մասնագիտությանը, որի ծիլերը պիտի սերմանվեն ընտանիքում՝ լիարժեք հոգեբանական մթնոլորտում: Այս նպատակի համար պիտի սերմանել հոգատարություն, հանդուրժողականություն: Սխալի դեպքում պիտի բացատրվի սխալը մեղմ, առանց գոռալու և անհարկի կշտամբելու:

Դժվարության ենք հանդիպում, երբ երեխան ընտանիքում մեկն է լինում: Այս պարագայում ավելի հետևողական աշխատանք պիտի կատարվի երեխայի սոցիալականացման ուղղությամբ՝ օգտվելով ուսուցիչների, դասղեկի օգնությունից ու մեթոդներից:

Մաս Բ

Կոնֆլիկտներ

Գլուխ 1

Կոնֆլիկտների էությունը, տեսակներն ու հիմքերը

Կոնֆլիկտը հակադարձ միտումների, դրդապատճառների, ձգտումների բախում է, որի հետևանքով անձն ապրում է խնդրահարույց իրավիճակ:³

Ցանկացած ընտանիքում վեճերն ու կոնֆլիկտներն անխուսափելի են: Եթե չկան վեճեր, նշանակում է ընտանիքում տիրում են սառը, պաշտոնական հարաբերություններ: Ցավոք, կան ընտանիքներ, որտեղ վեճերն անընդհատ են: Այսպիսի ընտանիքներում առաջ են գալիս քրեածին, կոնֆլիկտածին իրավիճակներ, ու այսպիսի ընտանիքները դառնում են անբարենպաստ թե՛ սովորողների, թե՛ հասարակության համար: Հիմնականում կոնֆլիկտներն առաջ են գալիս անբավարարվածության արդյունքում: Դրանք դրսևորվում են հուզական պոռթկումների ձևով: Պատճառների մեջ մեծ տեղ ունեն սոցիալական խնդիրները: Բոլոր դեպքերում կոնֆլիկտները խաթարում են ընտանիքի հիմքերը, ինչպես նաև ընտանիքի բոլոր անդամների հոգեվիճակի վրա թողնում են ցավալի հետքեր՝ երբեմն էլ դառնալով ճակատագրական: Հետևաբար, պետք է կողմերը և ընտանիքի մյուս անդամները հետևություններ անեն և փորձեն կոնֆլիկտների լուծման համար ընտրել այլ ճանապարհներ: Ավելի ցանկալի է խուսափել կոնֆլիկտածին իրավիճակներից: Այս դեպքում ընտանիքը կդառնա ավելի ջերմ, ներդաշնակ և կծղի բոլոր անդամներին: Հենց այսպիսի ընտանիքում են դաստիարակվում լիարժեք հոգեվիճակով անհատներ, որոնք հետագայում դառնում են հասարակության լիարժեք անդամներ: Լինում են դեպքեր, երբ անձը կոնֆլիկտների մեջ է հայտնվում դիմացինի դրդմամբ:

Ըստ տեսակների կոնֆլիկտները լինում են ներքին և արտաքին: Ըստ հետևանքների բաժանվում են՝ կառուցողական և ապակառուցողական: Կառուցողականի դեպքում կողմերը հանգում են դրական լուծման և վեճը վերածում բանավեճի: Որպեսզի կարողանանք խուսափել կոնֆլիկտներից, հարկավոր է այն ղեկավարել հետևյալ քայլերով.

1. Կոնֆլիկտի կանխատեսում
2. Կանխարգելում
3. Կարգավորում
4. Լուծում

³ Ս. Պետրոսյան, Ս. Խաչատրյան, Հասարակագիտություն, Երևան, 2014

Մյուս կողմից հոգեբանները վիճող կողմերին խորհուրդ են տալիս կոնֆլիկտի ժամանակ ցուցաբերել հետևյալ ունակությունները՝

1. Զիջողականություն, 2. Հանդուրժողականություն, 3. Հարմարվողականություն

Վերոհիշյալից պարզ է դառնում, որ ամեն ինչ պետք է արվի՝ կոնֆլիկտներից խուսափելու և հանդուրժող միջավայր ձևավորելու համար՝ ի շահ ստովորողի՝ վաղվա քաղաքացու:

Հաղթահարման ուղիները: Կոնֆլիկտների ազդեցությունը սովորողների

ներաշխարհի վրա

Կարծիք կա, որ կենցաղը հաճախ քայքայում է նորաստեղծ ընտանիքները: Եվ իրոք, նորաստեղծ ընտանիքները հաճախ վիճում են կենցաղային հարցերի շուրջ: Երբեմն էլ վեճերի պատճառ են դառնում անհամապատասխանությունը, խառնվածքի տարբերությունները, վատ սոցիալական պայմանները և այլն: Շատ հաճախ երիտասարդ զույգերը ենթարկվում են փորձությունների և պետք է միասնաբար հաղթահարեն դրանք: Կոնֆլիկտները գալիս են նաև ժամանակի ընթացքում: Եվ եթե զույգերը կարողանում են հաղթահարել դրանք, ապա ընտանիքն ավելի է ամրանում: Ներընտանեկան կոնֆլիկտների կողմեր են դառնում ընտանիքի անդամները: Երբեմն էլ դրանք արտահայտվում են ծնողների և երեխաների միջև: Այս պարագայում կոնֆլիկտների պատճառներ կարող են դառնալ տարիքային և մտածելակերպի տարբերությունները: Դեռահասության շրջանում սովորողը փորձում է ինքնահաստատվել, ձեռք բերել ինքնուրույնություն: Բոլոր դեպքերում մեղավոր են դառնում երկու կողմերն էլ, ովքեր համատեղ ջանքերով պետք է դուրս գան ստեղծված իրավիճակից՝ գտնելով ելքեր: Երբեմն էլ լինում են դեպքեր, երբ վեճերն ավելի են ամրապնդում ընտանիքը: Սակայն, ցավոք, քիչ չեն նաև այնպիսի դեպքեր, երբ կողմերը չեն կարողանում փոխադարձ զիջել միմյանց, լինել ներողամիտ, և ընտանիքը քայքայվում է: Եվ, ինչպես նշեցինք, հենց այսպիսի իրավիճակից խուսափելու համար անհրաժեշտ է, որ կողմերը պատասխանատվություն զգան, խելացի գտնվեն և գտնեն կոնֆլիկտային իրավիճակներից խուսափելու, կամ գոնե դրանք լուծելու այլ ուղիներ՝ հանուն ընտանիքի, իսկ նախևառաջ՝ հանուն երեխաների: Միաժամանակ էլ ավելի կարևոր է ներընտանեկան կոնֆլիկտը պահել ընտանիքի ներսում, լռել, չբարձրաձայնել, քանի որ դա ավելի մեծ հարված կլինի սովորողի ներաշխարհին:

Մակարենկոն ասում էր. «Մեր երեխաները մեր ծերությունն են: Ճիշտ դաստիարակությունը մեր երջանիկ ծերությունն է, վատ դաստիարակությունը մեր ապագա տխրությունն է, մեր արցունքներն ապագայում, մեր մեղքն է մարդկության առաջ»:⁴

Հետևաբար, մատաղ սերնդի ներաշխարհը չխաթարելու, ապագայում հասարակության առաջ անմեղ լինելու համար մենք պետք է հետևողականորեն ձգտենք ներդաշնակ, համերաշխ, հանդուրժող հասարակության ձևավորման՝ հանուն վաղվա օրվա:

⁴ Յ. Ամիրջանյան, Մանկավարժություն, Երևան, 2005

Եզրակացություն

Այսպիսով, աշխատելով հետազոտական աշխատանքի վրա, բազմակողմանի ուսումնասիրելով թեման՝ օգտվելով տարբեր աղբյուրներից, հանգեցինք այն եզրակացության, որ թեման, իրոք, շատ արդիական է, նպաստում է սովորողների մեջ բազմակողմանի և ընդլայն աշխարհայացքի ու կայուն արժեհամակարգի ձևավորմանը: Փաստեցինք, որ համապատասխան անձանց միասնական, նպատակասլաց և հետևողական աշխատանքի և մեծ ջանքերի շնորհիվ է, որ հնարավոր է ձևավորել ներդաշնակ ընտանեկան միջավայր, որի առկայության դեպքում է հասարակությունը հարստանում լիարժեք անհատներով, իսկ պետությունը՝ խելացի, պատասխանատու քաղաքացիներով, ովքեր կկերտեն ապագան ու հետագայում կնպաստեն հայրենի երկրի շենացմանը:

Տարբեր մանկավարժների, փորձառու մասնագետների կարծիքն այս հարցում միասնական է այնքանով, որ նրանք բոլորն էլ մեծ կարևորություն են տալիս կրթական հաստատություններին: Եվ իրոք, ուսուցիչները, տարիների ընթացքում կերտելով սովորողի ներաշխարհը, սերմանում են դրական հատկանիշներ, որոնք հետագայում կդառնան բնավորության գծեր: Մանավանդ դասղեկը, ապահովելով դպրոց – ընտանիք կապը, ավելի մոտիկից է ճանաչում սովորողին, նրան հուզող խնդիրները և լուծում տալիս դրանց տարբեր մեթոդներով ու հնարներով:

Հուսանք, որ հայ ընտանիքներում ավելի հաճախ ներընտանեկան հարաբերությունները կձևավորվեն փոխադարձ սիրո, վստահության ու հանդուրժողականության հիմքի վրա՝ ի շահ ամուր հասարակության և պետության:

Գրականության ցանկ

1. Յու. Ա. Անիրջանյան, Ա. Ս. Սահակյան Մանկավարժություն , Երևան 2005 թ
2. Պետրովսկի Հոգեբանություն Երևան 1975 թ
3. Ս. Պետրոսյան, Ս. Խաչատրյան Հասարակագիտություն Երևան 2014 թ